

新

衡

詞

新術詞卷四

錢唐張景祁蘇甫

綺羅香

西人照像張幔小樓羃蠶壳爲棚以透日光中度
鏡臺高三尺街員冰爲內外鏡令照者面內嚮離
鏡十步許凝坐不動乃以頗黎方片置鏡內攝人
影其上視既審則以帛蒙三面而納其機出頗黎
片傅以藥水漉漉如黃沙而髮絲衣褶纖微畢見
矣然後收頗黎之影於紙上一影可至數十本無
豪忽差其術頗祕不盡悉也漉上歌鬟小影留拓
多有按圖索驥者余前詞云不用明珠量十斛畫
圖買盡娉婷卽謂此也

羽幃圍春鮫匳射月離合神光能聚蓄意矜嚴略放眼波流
注指絮粉菱片裁冰洗鉛水麴塵吹雨最愁人寶匣開時繡
鸞顛倒甚情緒

影入鏡中則倒其小如豆而豪髮畢見

留芳還謝畫管都被

苔箋鏤出柔情千縷寸楮飄零應惜好花誰主縱未抵百琲
量來也勝似十眉圖取怕銷沈翠黛年年避風聞燕語

當風縣久

則影漸澹如鰓墨之留痕矣

西湖月

西湖藕花以三潭爲極盛環湖一角霞綃翠蓋彌
望無際朝暎未挂清風徐來輕舟容與紅香中如
在蓬壺仙境也每歲六月十八夜游舫梭織菱童
蓮女歌吹塵霄衣香薄人壁采蕩水余輒命儔歡
侶流連達曙截笛試酸摘葉裁詩此樂未之或改

壬申夏畏暑不出向夕千峰送雨銀竹奔瀉豈涇
川龍女欲鬪風鬚霧鬚邪宵深酒醒微月在窗追
憶勝游淒然成詠

西山忽卷珠簾乍葉葉荷喧半湖如墨水亭煙暝紗燈漸上
翠疏紅隙巫雲渾未埽想素韞淩波何處覓便夜久淨洗涼
蟾愁聽玉龍吟笛 年年夢選銀塘慣醉月攀芳讌遊良夕
鏡雲流豔瓊絲度韻畫匳澂碧蘋花今倦采怕更憶滄洲題
賦筆一任那冰簟驚秋夜階猶滴

駕噓序

秋夜述懷

西風漸欺病柳把寒蟬盡埽帶煙雨搖落無言似惜張緒年
少怕銷滅淩雲賦筆文園枉擬鸞坡草賸當時磨劒心雄化

龍騰獻 客裏登樓沉酒勸飲鬪旗亭句好慣催起羌笛離
情亂帆飛度天杪倚江皋連衣變雪望鄉國蘋絲愁縞感飄
零蠻語參軍是誰同調 征衫乍浣警角旋吹歎成烽四擾
一自那蜀鵲嗁斷塞馬嘶緊戰血青燐滿湖流照刀環夢冷
琴囊塵黯麻鞵踏徧千門月舊巢空怎宿投林鳥家山破缺
歸來萬木春深虎迹尙印城堡 新亭淚涇古屋蒹荒念鷺
朋頓杳漫點檢霓裳殘譜鳳管餘音彩翰空題錦袍誰召傷
心付與叢臺歌舞紗籠休問今後事訴悲涼都入金荃稿爭
知深夜吟蛩苦竹簾前鬢絲暗老

買陂塘

侯官陳蘭鄰先生嘉道閒爲會稽秀水令謝事歸
盡以鶴俸購書籍所得多善本曾繪歸舫載書圖

高致可想也其孫星邨釐尹筮仕來浙屬爲補題

因賦是閨

整輕裝便攜琴鶴歸艤先候春渚船窗萬軸青山疊此外更
無家具蘭櫂舉愛把卷臨風歎傲滄洲趣呼鷗共語向花嶼
移牀柳堂拓笏商略讀書處披圖畫一舸襄陽伴侶鴛湖
曾載煙雨細囊抵似連城富遺澤硯田留與君記取問草木
平泉過眼知誰主清芬舊緒想官舫挑鐙金陀補輯夢遶白
雲去

浪淘沙

放了剪刀閒乍起還眠雛雲纔攏便垂肩生小楊花知命薄
已解纏絲 箏柱十三弦數徧華年腰支無力鬪秋千手折
櫻桃剛背立忽近儂前

又

梁燕語春風簾幕重重宿醒初解半嬌慵
彊起兕鞦無意緒
枕暈斜紅
花事忒怱怱
猛雨聲中傷春情味與誰同
卻怕新愁人暗覺不畫眉峰

高陽臺

賦落梅

屣響巡廊袖寒倚竹冷香吹上眉梢
撲雪簾櫳相思人在蘅皋
東風零落珠鈿細記當年宮額輕飄
最難禁翠羽噉煙不管魂銷
一枝空向天涯寄待傳書驛使說與
無聊獨立蒼苔斷雲飛過谿橋
高樓且莫聽橫笛怕從今玉瘦香消掩屏
山九疊芙蓉倩影誰描

永遇樂

長安人海之地韋曲名花叢臺妙伎駢集一方每
屆薄暮比戶懸鐙流水接軫靚裝袞服聯襪赴招
亦金谷之俊游夢華之遺意也時當銷夏同人作
瓜果之會戲用日湖體寫之以誌燕臺風景云

簾展筠屏鏡臨紗檻微風生涼晚玉橫簪秋羅翦韞偷試宮
樣妝飛箋催遞籠鐙催駕亂鶯喚過鄰牆簾櫳悄調冰坐久
不知盼斷蕭郎銅街露重鈿車雷轉醉歸扶住鴉鬟雀扇
兜懷犀梳整鬢蓮漏猶未央重添蠻蠟閒熏湘管幾回冷盡
蘭湯銷凝處桐陰拜月自燒夜香

水龍吟

甲戌初冬登煙雨樓望遠成賦

渚禽飛破寒煙塔尖猶戀斜陽瘦雲帆幾點漁炊幾縷乍無

還有斷澌菱荒危碣荻老秋容非舊對滄洲
畫裏緇塵未浣應空羨垂綸手屈指鱸前雁
後醉芙蓉甚時攜酒鴛鴦何在錦箋難寄笛
波遙奏夢醒茶禪霜欺詩鬢天涯知否待春
來重到憑闌看雨折南湖柳

意難忘

銀蠟重燒向珠筵夜午酒盞紅潮粉箴調賦
筆紫袖鬪宮袍無限態可憐宵待月上窗綃
最殢人簪花秀格小字偷描秋來何事魂銷
早芙蓉綴雪別夢迢迢畫屏金鴨冷古道玉
驄驕迷楚峽望藍橋怕咽斷瓊簫忍更聽吳
娘舊曲暮雨瀟瀟

摸魚兒

吳門贈別用阮巖元夕吳門姚子章席上韻

惜蘇臺掃花人瘦湘匳眉黛慵畫靈和柳色都非舊何況鏡
中春冶才思謝染十樣雲箋錦字教儂寫清歌勸年悵紺裏
偷攜香車密送難挽玉郎馬 離懷苦懶對紅嫣翠妬燒鐙
重約良夜斷腸偏唱淋鈴曲忍看淚隨聲下卿且罷問涇徧
青衫誰是知音者扁舟去也待喚取霜鴻新詞寄與麝墨沁
蘭帕

木蘭花慢

怪輕帆翦水纔一霎過垂虹歎側帽詩情簪花賦手贏得飄
蓬恩恩翠尊易散指星辰昨夜桂堂東瓊樹歌聲未闌玉蛾
心性潛通 離悰雲海萬千重後約怕成空縱橫波流媚兒
絲送暖難訴深衷朦朧茸蟾漸滿問團圓人面可能同只恐
青霜鏡裏錦江老盡芙蓉

摸魚兒

當湖道中遇雪

閣輕陰水窗寒重曉來篷背初埽癡雲壓岸波如墨不見冷
鴉飛噪村釀好怕做卻貂裘絮沾難到晴曦未老看遠樹
撐煙孤帆帶雨雁度朔風峭橫塘路香稻紅蓮乍飽魚租
還又收了弄珠樓畔梅花夢玉笛數聲催早歌縹渺算勝似
吟鞭拂雪長安道江湖歲杪甚凍硯常攜枯瓊自擁應被白
鷗笑

浣溪紗

如夢光陰不當春慵開寶鏡拭新塵海棠紅瘦幾朝昏
眉語悄回銀燭暗手香微熨繡巾溫不因芳草怨王孫

又

忍聽恩恩唱渭城寶箏絃語忒分明尊前偏作斷腸聲
海
上青鸞原有翼屏間金雀豈無靈獨將離恨付卿卿

金縷曲

夢醒金臺月夜朦朧梅花紙帳角聲吹裂彷彿西窗銀燭背
低卷芙蓉繡纈更九子風鈴微掣堆鏡香雲慵不整放珠簾
手把鑪熏撥寒尙峭病還怯茂陵秋雨音塵絕悔當初蒲
桃酒釀玉人輕別歸去江南煙樹裏早又霜摧榭葉且莫問
傳柑時節候雁不來關塞冷莽天涯飛盡龍沙雪誰念我賦
羅襪

丹鳳吟

張公束同年囊筆金閨別六年矣今春重遇於湖
上懽然話舊以所著寒松閣詞見示冲遠蕭曠一

洗靡曼之習雨夜翦燈讀之眇眇兮予懷也

南湖煙雨慣一舸尋秋賣花多處韻入瓊簫合付小紅吟侶
香溪俊游縱好歎年來未歸羈羽對酒秦川聽鶯杜曲渺閒
情何許倚畫簾慵寫斷腸句怕鏡檻塵空新染霜縷時方悼亡
側帽沙隄又是滿衣風絮西園甚時醉也柰沈沈翠陰庭宇
靜埽茶煙半榻倩詩心留住

夢芙蓉

前客京邸與羊禪庵比部竝馬看花連牀聽雨冰
襟雪抱訴合無閒及余乞假南旋禪庵餞余於紅
蓉池館以花谿漁笛圖屬題爲譜夢窗自度腔一
解它日付雪兒歌之當不減曉風殘月之淒黯也
綠蓑肩半倚逗秋心幾點櫓歌聲裏渚花飄雪孤響墮煙際

白蘋風又起一枝吹冷詩意買醉湖濱任臨波唱晚柳外釣
絲橫 懶向長安索米西崦前村擬共商漁計曲終人遠香
雨滿身洗鷺盟尋也未桃源別有天地且約扁舟把樵青載
得來往霅谿水

壽樓春

張憶嬈簪花圖摹本爲許邁孫作

知春風多情倩冰綃翠罽留住娉婷依約鬟雲低顰臉波微
頰鸞鏡掩雛釵橫記上頭花枝盈盈自暮雨歌殘朝霞賦倦
蘭麝總飄零 空贏得青樓名是人閒謝女天上張星可許
瑤英再降玉簫重生羣畫黛尋香盟問舊歡誰當卿卿想金
谷園荒門前曉鶯催夢醒

疏影

王丈小鐵爲余作梅雪雙清圖用石帚韻寫之

飛霏凍玉記夜闌紙帳曾伴花宿冷到無言香到無痕垂垂
壓損窗竹仙心澹抱冰壺澈儘偎暖硯南琴北柰翠禽月底
驚寒撇了綈衣人獨長憶瑤臺舊夢酒尊泛更滿低暎鬢
綠修到今生證到前身消得藏春金屋休歌散雪歌團雪合
付與串珠新曲待數來二九韶華點上茜綃屏幅

瑤花

前題

梨雲澹白鶴夢偎寒占人間今夕梁園賦好渾未老鏡裏簪
花詞客珠簾乍卷早凍涸苔枝盈尺休更誇穠李爭春怎鬪
玉堂顏色迷茫九鎖山前怕踏徧芙蓉香影難覓涼蟾半
挂曾喚起樓上羽衣吹笛瓊花自舞莫暗裏誤投簷隙牘夜

來一縷冰魂除了翠禽誰識

醉江月

題東坡遺琴卽用公赤壁懷古韻

乘風歸去歎千年寥落尙留遺物響夏寒泉鳴佩玉雙淵橫
飛絕壁魚出重淵雉登古木彈澀峨眉雪浩歌一曲海天空
老詩傑猶憶湖苑秋高溪堂人靜慣聽瑤徽發夢裏秦箏
都是幻況說蛇斑明滅賀若難尋永師何在獨岸綸巾髮松
閒重撫指聲涼瀉秋月千年寥落獨琴在坡公句過終南日
令道士趙宗有彈琴溪堂又元祐六
年九月十五日彈琴西湖俱有詩

虞美人

樓頭日日聽春雨不放嘯鳩住穿簾新燕爲誰忙銜得芹泥
多少上雕梁無邊草色天涯滿夢逐金鞍遠隔牆紅出杏

花梢一任東風吹颭酒旗高

天仙子

煙柳垂隄春已半
綠翦靡蕪芳徑輦
殷勤織錦待郎歸
雲鬢亂新愁
綰鸞鏡照心千里遠
風裏落紅拋采扇
蜨夢如塵迷故苑
知他何處繫花驄
釵影顫金尊滿
高燭當樓簾不卷

清平樂

雛雲墮髻省識愁滋味
不惜千金求獺髓
爲補遠山眉意
雙雙語燕簾櫳
林花未落春紅除卻圓冰
一片箇儂心事誰同

浪淘沙

攏罷碧雲釵
白紵親裁驚峰剛道進香來
儂是家山君是客
各自天涯
風定繡簾開
乳燕驚猜綠陰漸漸滿歌臺
如此

西湖歸未得且勸銜杯

罨馬索

乙亥重午訪公束於雲閒示余魏槃仲分書聽雨
二字橫額并屬書蔣竹山虞美人詞於後舊雨重
逢倏焉賦別因以聽雨爲題作此寄之

碎秋心半是芭蕉半叢竹鈴階暗滴似傾孫楚愁千斛簷花
細落酒人都老苦憶連牀離情促正驛橋夜火微明笛裏瀟
瀟斷還續幽獨那回曾聽畫樓殘點羅帕閒題舊時曲此
去孤篷何許汀洲煙蕩鳴荒綠湖天夢晚又報迎梅曉鳩聲
中流光速待與君一尊重話翦盡西窗幾枝燭

沁園春

爲李景卿觀察題達摩面壁圖

一葦渡江何處打包空山寂然笑十年鎧火身儕槁木千尋
雪壁色湧青蓮肩任鷹巢足憑虎舐不放元神到外邊生來
定儘蒲團坐破了不知年難尋隻履翩翩又飛錫重還蔥
嶺顛甚花鬘隊裏逍遙色界龍華會上游戲人天現宰官身
發菩提願功德應須徧大千君曰否且休譚世法牢守心田
達摩既入涅槃慧熊耳山三年後有魏使宋雲自西域回見
達摩於葱嶺手攜隻履翩翩獨游雲言之孝莊帝使人發塔
開棺惟隻履在耳見傳鐙錄

西吳曲

高茶庵司馬佐郡閩中別逾三載今夏因差旋里
歡然話舊惜余又有甬上之役不獲久留爰譜是
闕以寄意

話分襟勸盡卮酒邇英游卅載怕回首縱江關賦好蘭成蕉

頓非舊劍躍龍津且小試挈雲身手

曾署延平府上洋通判

想醉臥花

雨琴牀定夢遶畫橋煙柳 諸羅故壤歎翠島生塵談兵氣

雄坐右

時臺灣海警初平

奈此去鷓鴣嗟恨年年黯銷魂處總付綠

榕紅豆湖山在眼甚日共卸朝衫買一頃陂塘兩家種菱藕

四犯翠連環

秦澹如都轉招集湖舫時積雨兼旬萍波拍岸新
荷出水微露紅衣宿靄空濛中頗饒幽致恨無范
寬圖畫以寫之

樹色關雲簾痕閣水全湖倒涵波暝三尺碎萍移舊碧不放
過橋篷影雨深荷氣淨跳珠亂點瑠璃鏡午曦纔漏縠紋初
定宿醉臨花醒 此境宜浣縹塵怕等閒輕負綠蓑煙艇乞
賜可能如賀監容我種魚千頃宦游情味冷滄浪一舸誰乘

與風漸猛回望層嵐合遮了雙峰頂

紅袖扶

閩粵以檳榔蘘製扇烙成花鳥人物豪髮畢肖扇背平貼如紙足供吟寫

風自南來薰吹墮瘴雲千葉料不數文蒲纖軟翠蕉輕滑藤牀有人這暑夢羅浮誤撲花陰蜨紗幮底桐圭一握袖香微裊題倩書帶手恰勝似麥光鋪雪君試看棘鍼花鳥鷓斑能熟銅槃舊時餉否話炎涼一例傷捐篋披襟處還銷宿醉冰簟清絕

浪淘沙

秀靨暈芙蓉寶鏡春濃挑鬟微墜折枝紅斜背銀釭回一盼無限嬌慵綠綺韻偏工心事璚瓏相思不斷悔相逢咫尺

雲屏天樣遠青鳥誰通

又

絮語不分明暗惱嗁鴛花閒攜手曲中聽不是金釵人半醉
佯帶春醒 眾裏目先成我亦憐卿一聲歸去重丁寗回首
小梯橫閣畔卽是長亭

又

蘭燼暗飄雲屏角燈昏晚妝重理口脂勻注了嫌濃塗又澹
微拭羅巾 學作比肩人攏袖香溫只知歡笑不知顰戲把
玉堂揮翰手徧數螺紋

又

簾外月如霜彈徹清商生憎鷓鴣母慣周防笑託芙蓉傳隱語
若箇思量 雲篆寫琳琅雜佩相將蘭陵美酒鬱金香誰信

文園消渴甚不乞瓊漿

酹江月

乙亥仲冬薄游武昌胡月樵都轉招飲紫藤仙館
竝以行卷屬題漫譜此解

巢痕新埽早千金購得玲瓏池館雙榦盤螭森似鐵壓架紫
英都滿琴閣陰濃印牀花落苔徑鋪茵頓晴檐負手晚紅餘
翠零亂歎我闌歲來游園鑑待雪未醒看花眼酒虎詩龍
無恙在高會喜陪山簡袁廉叔明府在坐時契闊已二十年矣漢上題襟天涯
滯羽夢冷傳柑宴春明重到禁中芳事過半

滿江紅

雪夜過綠綺閣聽琴用迦陵韻

撲雪簾櫳人正在蜜梅花下晚妝靚貂茸緹額跋來細馬珠

纈亂翻鸞鏡舞瓊輝豔奪羊燈挂只玉蔥拂軫太寒生熏鑪
把 捱不滿歸期假買不斷良宵價恁輕排慢攏橫波縈惹
曲罷易添離別怨燭殘忍聽纏絲話最撩人袖底擲香橙兒
羅帕

是夕譜梅花三弄陽關三疊

金縷曲

用竹山韻

小折藏春屋掩湘屏斜舉翠幌麝塵低撲寶鏡臨妝頻呵手
懶埽官眉秀綠忘飼了鸚哥紅菽漏水初冰虬壺絕夜如何
且試文楸局移玳几剔銀燭 風簾響戛琤琤玉怕分飛輕
鷺咫尺細將聲卜背解貂褕盤雲髻淺露鴛襦繡幅再休把
腰支重束便賦梅花心如鐵忍厭厭坐聽瑤琴曲窗外雪折

檐竹

蝶戀花

次慕庵韻四首

金鴨香銷龍麝餅
晚雨淒迷潤逼芙蓉錦
依舊瑣窗臨寶鏡
青山不把愁蛾映
繡幙低垂蓮漏定
暗卜金錢誰遞郎邊
信解道阿蠻新瘦損
釭花空照宜男枕

又

飄盡柳絲千萬縷
裝點亭臺桃李春無數
雨溼林花無覓處
嗁鴛只隔牆西路
箏雁蕭條停玉柱
消息誰傳卻惹紅兒
語倦蜨迷春猶自舞
東風又逐榆錢去

又

曲曲屏山朝復暮
鴟鳥枝頭錯認雙棲樹
一舸鴟夷何處去
五湖原是傷春路
恰怪游絲黏落絮
不怕春歸陣陣風兼

雨燕約鶯期偏又誤葳蕤深鎖閒庭宇

又

鎮日彎蛾消舊翠寶帳分題麝墨都成淚屏角兀央空獨睡
簫臺不見乘鶯子冉冉碧雲飛又起月照離愁不照金尊
洗花落櫻桃門巷閉玉鞭何日垂楊倚

浪淘沙

除夕無事偶憶周晉仙明日新年一闕落想奇麗
輒同其韻

歷歲費金錢到曉無眠爲伊檢點孟家蟬說與孤山梅信早
好放遊船鏡聽向誰邊默證靈緣曙窗殘燭尙熒然小婢
也思簪彩勝明日新年

又

賸了畫叉錢冷醉閒眠莫將身世歎秋蟬且學東坡詩餞歲
滿勸觥船呼雉繞牀邊笑我無緣青氍毹情味故依然打疊
紅箋書好句明日新年

又

閉口不言錢未許高眠臘鐙影裏對雲蟬猶勝松陵風雪夜
寂寞歸船蛇壑去無邊易醒塵緣兒時回首一懷然預想
太平簫鼓樂明日新年

又

準備買鐙錢好賺兒眠椒盤分減到銜蟬更得長恩教守籍
穩載書船餞歲向梅邊冰雪前緣全家語笑共懽然沈醉
不知蓮漏盡明日新年

又

覓句選青錢我尙遲眠冠綬何用飾金蟬應笑送窮文字禱
草縛車船 春柳玉河邊幾度沿緣蘭闥心事獨悠然暗祝
芻尼先報喜明日新年

新舊詞卷四終

新蘅詞卷五

錢唐張景祁蘇甫

尉遲杯

題嚴珊漁刺史黔山策馬圖用詞隱體

萬峰削繞熨道懸溜似劍閣蒼然隴首雲飛鞭指夕照城郭
牧伯建油幕甚獨控晉裒金絡索踰羊腸九折都盡髀肉雄
心同託 牽絲徧歷邨落喜瑤女蠻童篠簜雀躍緩轡巡春
蘆笙四起漫道土風偏惡回思俊游故鄉樂繡鞵擁踏雪孤
山角憶軍中橫槊歸來錦衣威望如昨

齊天樂

丙子閏五月七日胡雲楣同年招集城南龍樹寺
帝城喬木風煙接精藍此中堪隱石古藏雲葭深抱水不放

炎歊紅近龍眠壘本只法界樓臺黯銷金粉玉塵談元一時
帶屐盡豪儔 輞川吟思更好露葵松下摘花雨猶潤禁柳
移陰宮鶯換譜同惜天涯塵鬢清觴漫引忍重聽何戡笛波
殘韻日落高槐遠空摩健隼

余與雲榴皆以庶常改
官縣令故後闕及之

一枝春

落梅詞

不管清寒問東風忍把高枝輕掃瑤臺夢杳未許探芳重到
生涯慣冷任離落水邊都好誰會得千種飄零併入笛聲淒
調 仙雲甚時流照歎珠塵半委萼華空老無言更苦肯怨
早春嘯鳥關山去也又蹴損馬蹏多少還盼取點額人歸翠
尊共倒

浪淘沙

暢好聽鶯天夢雨連絲春風已到楝花前一綫韶華無計買
浪擲榆錢笑我醉中仙白袷翩翩長楸走馬憶當年不怕
黃塵吹短鬢且著吟鞭

又

瓊島隔重重翠靄浮空鳳簫聲斷月明中一曲霓裳剛罷唱
吹下天風鶴夢去無蹤何處雲峰未妨豪氣敵千鍾起抱
箏篴彈別調燭淚銷紅

浣溪紗

自津門乘輪舶南旋夜宿吳淞

絕頂蓬萊不可留
颺輪直下海東頭
一枝鐵笛老龍愁
遠樹漸昏津鼓動
繁星亂颺估檣收
不知何處是高樓

金縷曲

舟泊黃浦對月寫懷

喚起銀蟾語問因何攀香鏡裏帶儂飛去幻作團圓人面樣
穿入珠簾繡戶攜彩筆替傳眉嫵墮馬妝成雲鬢委撥鴟絃
邀我尊前顧親攬袖恨重訴劉郎已隔蓬山路歎風塵一
般淪謫此情非故縱使青鸞無羽翼忍遣良期再誤更休道
姮娥偷妬魚子蘭香仙荔熟願生生錦瑟華年度乘一舸可
能否

一翦梅

十里沿洄櫂九停纔報潮平又報潮生渡江桃葉幾時迎風
送歸程月送離情夜半寒蘆帶雨鳴聽徧篷聲數徧郵更
錦袍遷客恁飄零昨夜雲屏今夜江城

水調歌頭

將赴閩中留別西泠諸友

碧海掣鯨手一笑下塵寰摩挲長劍出匣氣射斗牛閒不羨
袍披錦纈何用腰懸寶玦且試牧羊鞭願繫月氏首圖畫間
淩煙 浮生夢封侯相料無緣故山松桂如許歸隱是何年
待訂吹簫俊約同譜賓雲雅樂來訪幔亭仙瓊島任晞髮醉
抱玉蟾眠

菩薩蠻

丁丑初秋寓居閩南節署莊仲求司馬以陽湖董
方立蘭石詞見示愛其情至文生麗而有則因次
其韻八首亦以寄遲暮之感也

冰綃畫扇橫蟬雀夢痕瘦翦秋雲薄檐玉語深更泠泠瑤瑟
情 紅蕖描倩影寶鏡懷中省舊燕寄相思卷簾人故遲

又

青禽無力填滄海博山屏背盟言改春柳自垂垂飄零能幾
絲明珠穿別淚不照心頭事歌舞樂平陽背人還斷腸

又

踏歌緩緩花開陌冥濛花霧朱成碧揀盡鳳棲枝梧桐秋雨
時暗蛩吟鮮徑燈倚紗幮靜強把玉觴飛自憐金縷衣

又

香車記迥燒燈節銀河又度新弦月停畫曲眉妍綠窗貪簪
錢秋棠綠砌面釵朵餘蔥蓊熟罷鷓鴣斑篆痕心上看

又

流蘇低綴芙蓉纈長庚到曉空陪月羅袖碧霞鮮酒痕思去
年銀簪剛炙暖紗幔當窗卷香露拂蘭叢借他團扇風

又

儂家生小長陵住東風吹徧枝頭絮不敢妬鴛鴦采繩千縷
長鏡塵羞半顰青鳥傳書遠舊曲理雲屏忍催花夢醒

又

悲秋鵬鴒憐芳草玉笙空憶長安道紅淚泣蕉心替人愁不
禁鬱輪新譜冷珠絡檀槽迸粉墮曉蓮空露華前夜濃

又

篋中怕檢羅囊紫塵沙撲面嬋娟子不怨薄衾寒鏡鸞生自
單迢迢河漢影絡緯曉金井星斗漸闌干笛聲猶未殘

浣溪紗

墨暈窗紗水暈匳春愁濃似綠陰添放他胡蝶出重簾茗
片乍回香篆散琴絲不動落花黏無人知有雨廉纖

臨江仙

夜宿龍溪古廟峭寒特甚追懷舊游惘然成詠
卷地蘆花驚宿雁荒村夜柝聲殘亂愁渾似疊青山垂簾官
燭短擁几客裘單記得瓊樓同聽雪冰弦隔坐輕彈熏爐
繡帳不知寒低徊心上事舊月照闌干

醉江月

題左右修竹圖

萬竿煙雨指空濛畫裏寒碧如許曲折疏籬搖鳳尾蔭入桃
笙無暑石几支雲桐閣界水靜悟眠琴趣縱橫圖史座中誰
是吟侶何似祓禊蘭亭流湍映帶同作林泉主虛谷簷簷
容小隱只放青山當戶待客煎茶呼童埽葉鶴夢無尋處倚
然終日翠筠劃徧涼句

又

吳仲英太守自號了無大師繪拈花微笑小影俞
蔭甫先生爲題間木犀未四篆字余譜此閑

前身金粟悟天花散處聞根無礙舊衲雲披涼翠疊黃雪輕
飄衣帶蓮社尋詩松閣聽梵高會辭冠蓋空巖坐虎不知游
宦人海 猶憶酒座縱橫談空說有激箭機鋒快面壁年來
無一物底用傳鐙眞派鼻觀香清指頭月朗妙想超塵界茅
庵留未莫教麾我門外

花心動

羅浮胡蝶曝書亭詩中屢詠之惜詞未之及也賦
此爲花奴訊

影蛺仙裙展霞綃翩翩綵翎低控繡笈乍開金扇旋拋寬徧

五雲巖洞探芳原是蓬萊使肯長被粉匳馴弄想前度扶桑
曬日蘭圓如甕屈指南風化蛹惜過了梅花未蘇愁夢嶺
畔荔丹屏角蕉紅雙翅也憐香重伶俜易抱秋圓感料輸與
早春么鳳笑蠻女垂髻幾絲翠攏

金縷曲

戲題鍾馗校獵圖

鬼膽今何壯布長圍環山角逐亂飛刀仗陰火燒空衰草盡
雨血風毛悽愴看擊稍鳴鉦來往槐笏卓紗稱進士笑前推
後輓皆奇狀貌背聳躍而上當年天寶干戈攘歎紛紜豬
龍煽動夔魑爭長卻怪老髯旁袖手謾訓雄姿颯爽更底事
窮按林莽狐兔么膺安足問豈筵開嫁妹庖廚餉判醉倒撥
蒲釀

浣溪紗

澹沱春陰罨碧紗。瑣窗人靜看盤鴉。坐來雖近似天涯。皓
月無心臨止水。輕雲著意護高花。銷魂可是錦年華。

柳梢青

題梅蘭帳額

斗帳香溫綠輦紅。笑采筆生春。澧浦人歸。湘皋月墮。都是銷
魂。鐙簾澹蕩無痕。更添與梨花夢雲。一枕相思。暗隨胡蝶
飛過前邨。

金縷曲

茶庵屬題把酒問天圖

笑縱談天口。望蒼穹浮雲變滅。盡收卮酒。呵壁荒唐真宰泣。
底用離騷熟透。問奇句宣城攜否。青眼高譔塵世窄。去來今

明月何時有還仗我埽愁帚 九閭詖蕩誰能叩算何如糟
邱枕藉醉鄉消受劒倚長空杯滿引直氣堪驚戶牖甚終古
才人不偶只恐碧翁難作對把鴻文付與河東柳空起舞擊
銅斗

唐多令

仲英寄梅花老屋圖索題既成長古二首復賸以
詞

煙水隔城隅春風憶舊廬歎重來滿目青蕪月墮湘皋詩夢
冷問何處影扶疏 宦迹託雙鳧歸心滯五湖醉淋漓海嶽
新圖官閣梅花香正好且休道訪林逋

念奴嬌

同里潘儀甫孝廉負才絕特屢上春官不第託於

歌酒以抒鬱抱丙子出都後游幕保陽時予亦謁
選南來數載音耗闊絕偶檢故篋得其都中見和
念奴嬌詞含思淒惋大有子雲牢愁之感因追和
其韻以哀絲豪竹寫之不止言愁始欲愁也

春愁如綫驚隨空蕩漾散成千縷銷盡登樓王粲興暮色最
憐高處笛冷吟龍酒醒聞雁此恨和誰語貂裘敝矣雪花偏
滾風絮獨自買醉旗亭長安不見撲面黃沙雨海燕南來
芳信斷那得離情寄與舊院箏塵荒邨鈴馱都入淒涼句渭
城一唱鬢絲今已如許

原作

潘鴻

水沈香燼撥寒灰賸有春心一縷如此青袍芳草色酒醒
天涯何處花惱含愁蓬飄墮夢握手渾無語天風吹斷隔

簾幃認飛絮 鸚鵡莫話三生一般憔悴忍見輕紅雨寶
鏡圓圓休照影空把柔情付與宛轉蠶絲叢殘蠹粉那有
傷春句回廊倚徧夜來風露如許

水調歌頭

乙亥初秋余赴明州與同年友陳魚門觀察周珊
梅詹黼廷庶常楊澹泉王子獻孝廉徵歌選勝歡
讌市月極一時羣屐之盛今忽忽八年矣魚門已
歎宿草珊梅黼廷澹泉服官京邸子獻尙隨宦明
州故交星散舊游若夢殊不堪懷偶檢子獻題余
詞藁水調歌詞因和其韻

越鳥尙思越秋士獨悲秋平生豪氣湖海樂事數從頭拍手
觥船酒滿圓坐筇牀月暖拄笏聽歌喉忘卻玉繩轉漏箭促

銀釧 細塵感華屋慟夢悠悠天風吹下瑤闕散髮臥滄洲
苦憶黃樓盛會銷盡青衫古淚寂寞大江流醉弄第三笛舊
曲老龍偷

原作

王繼香

題蘇甫同年新蘅詞

倚醉摩銅筵萬里碧天秋不知何處仙樂飛落海東頭爲
喚瓊妃起舞重與詞仙按拍次第付珠喉檀板動遙夜驚
起玉花釧 揚州夢新亭淚恨悠悠廿年踏徧湖海歎傲
上瀛洲底撇九霄風露來看四明花月三影劇風流珍重
羽衣曲莫被李暮偷

永遇樂

客夏綰篆辰山岫屆瓜代間有臺海之役宦轍頻

遷座勞莫息歸乏半椽之借坐憂三徑之資回視
柴桑老人殊多媿色也

樹暖移鶯巢新徙燕驚換芳信海角帆催山城鼓統未許幽
棲穩園瓜蔓短亭松鍼細便觸江湖離恨怨東風留春力薄
亂紅飛絮成陣萍蹤暫寄年年飄泊鏡裏暗銷塵鬢菊徑
煙荒蕩波秋老莫把鄉書問滄溟濯足扶桑晞髮舊日壯懷
都盡算何如一庵臥我洞霄吏隱

滿江紅

癸未仲夏養疴官舍岑寂無聊偶憶張船山檢討
集有仙龍鬼蜮四詩戲易長短句詠之聊代七發
兼寓漆園虛舟之感也

彈指樓臺幾游戲蓬萊海東驀上界鸞笙歌斷鳧淩空石

洞春深長守鹿絲橋霞起欲鞭龍好山川偏愛幔亭游高會
逢 嶰山雪收煉容酈泉水洗方瞳謫陽狂塵垢誰識奇蹤
揮手雲煙千劫外跳身天地一壺中問塵寰何處著松喬亡
是公仙

又

不作閒雲要分付爲霖萬方憑仗汝天瓢一滴灑徧窮荒尺
水蟠泥忘局促神梭破壁起昂藏把旱苗蘇盡不言功歸帝
旁 天池奮應瑞昌樺木挂燭幽鄉肯長潛絕壑冷臥高岡
一夜風雷通變化十洲宮闕隱汪洋喜海天如鏡淨無塵靈
旆揚龍

又

深夜誰來振木葉微風動櫺怪一霎荒林月慘古屋鐙熒總

帳模糊圓有影塵梁撲簌下無聲更秋墳酸唱鮑家詞幽露
零 柳車縛推不行紙錢燕巖相爭笑寒肩瑟縮偷瞰高明
罵到東方宜破膽度來西佛枉邀靈敢路旁白晝肆揶揄頻
現形 鬼

又

委蛻無心料不把蠶絲再牽剛出脫生機活潑又入纏絲依
草乍驚風片重繞花空吮露華鮮只秋園幾日瘦伶俜寒可
憐 羅浮夢思散仙青陵恨化輕煙歎舞衣飄盡猶學翩躚
出繭頓成無住相抱香長託有情天上畫堂不避卷簾人飛
過肩 蛻

卜算子

愁絆柳絲長迹逐萍根聚欲轉飛紅上故枝誰繫東風住

素綆墮銀瓶寶鼎焦香炷窗外嘯鴉不避人窗裏人無語

雙雙燕

秋燕

玳梁對語歎門巷烏衣舊家誰主巢痕剛暖又觸故園離緒
漫約催歸伴侶看玉翦將飛還住自憐瀚海飄零也學年年
羈旅辛苦天涯倦羽怕負了深閨寄書香縷重簾空卷咫尺
畫堂何處容易流光夢雨便銷瘦紅襟如許何況萬里西
風更送玉關人去

高陽臺

張笏臣太守水閣聽秋畫扇

竹雨敲窗松泉漱枕憑闌獨自驚秋瑟瑟輕寒溪光約住簾
鉤是誰壓箇煙波外暗催他夢醒閒鷗惹新愁半在楓林半

在贛洲 西園飛蓋當遙夜記停琴翦燭共話清游羽輦臨
江又逢月上南樓蕭疏幾點蘆花影挾風濤如坐行舟小亭
幽聽徧蛩聲數徧更籌

沁園春

殷心齋司馬姬人鄭蕙字雪蘭平陽儒家女也幼
耽文史喜事吟詠所著素心閣詩如雨中蘭焚香
曲及擬古諸作幽情雅韻原本風騷殆道韞左芬
之亞與鸞鏡易塵臺花早萎心齋既有朝雲之悼
掇拾遺蘂屬爲商定因櫟栝詩中語爲譜是闕

一片騷情雨泣幽蘭嬋娟可憐憶鏡臺春笑揉香索句鑪熏
夜擁呵凍分箋囊妒榴紅玉鐫茗翠生小柔腸別樣牽沈吟
久想忘添半臂損了清眠 無端錦瑟華年便彈折春風甘

四弦歎九張機上尙餘采段六如亭畔空懺金仙麝墨緘愁
鸞簫咽恨收得叢殘更幾篇耶心苦但墜歡如夢夢也如煙

柳梢青

不定香魂將花作幔藉草鋪茵新繡鞵弓別翻琴譜一餉逡
巡闌干幾摺回文鎖不住樓頭夢雲拋卻時光兩三點雨
八九分春

河傳

鸞鏡花映雛釵纔卸醉妝重整多情靈鵲不成橋迢迢玉笙
閒半宵欲託微波通款素朝又暮空把良期誤月如鉤水
東流憑樓目窮天外舟

釵頭鳳

簾波暈衣熏潤文鸞坐待簫聲引繩河挂星橋駕良宵已是

一 著錄詩卷五 二
燭殘香燭罷罷罷 書無準情無盡雲
軒更約秋期近風飄
瓦人占卦閒排碁局悶題羅帕且且且

采桑子

秋晚臺江夜歸對月聞歌

江村最是深秋好寒荻飛花紅樹棲鴉脫卻朝衫把酒賒
清歌隔岸黃昏近酒醒天涯柔艣啞啞知是漁家是笛家

更漏子

將赴臺北遲輪船不至久客榕垣賦此遣悶

卷詩勝收畫幙家具并無琴鶴思破浪便乘槎海天何處家
銀鱸粢金菊綻不道句留歲晚風日好挂帆無秋江聞鷓
鴒

金縷曲

節署盆菊盛開何小米尙書招同幕賓黃芑香孫
秉臣兩明經公子西林孝廉譙飲花下卽席賦謝
兼以誌別

綠野華堂啟對秋容黃花晚節玉尊重洗豔帶霜腴香帶露
圓得亭臺似綺想一壺一卮情味脫帽風流容寄傲勝鳴笳
飛蓋西園裏持燭賞夜深未 清香畫戟森嚴地笑疏狂詩
龍酒虎尙餘豪氣老矣參軍蠻語澀怕聽驪歌喚起儘點筆
石闌斜倚苦約籬東歸臥早且海隅商種閒桃李休恨別爲
花醉

綠意

題毘陵左冰如恭人冷吟館詩 恭人名錫嘉幼
嫻詩教兼工繪事爲蜀郡曾吟村太守繼室太守

由部郎出守吉安被議奪職從軍皖南歿於營次
恭人扶輓旋蜀含冰茹檠教育諸孤牢愁侘傺一
寓於詩故所作多變徵之音亦其遇使然也今哲
嗣皆登仕版蘭玉蔚起差足稍娛晚境矣

團香散雪羨舊家美眷才調雙絕十載蓬飄官閣垂鐙銀箋
滿貯吟篋征衣頓觸遼陽感早夢裏刀環敲折便倒傾濯錦
江波怎寫此情嗚咽堪歎牽蘿歲晚自憐翠袖薄辛苦誰
說目斷飛雲魂斷歸舟底處江邨黃葉秦樓賸有吹簫譜也
化作蜀鵲啼血待板輿扶醉花前忍憶紡甌寒月昆陵有黃
屢及之即東坡詩所云
家在江南黃蘗村是也

買陂塘

亡室吳宜人歿二年矣旅櫬未歸權厝榕城開化

寺忌日率眷屬追薦老懷淒惻感逝成歌

向西風鬢絲搔盡今生顛顛如許薄衾小簟寒先覺聽徧茂
陵秋雨腸斷處是幾杵鐘聲蕭寺殘陽路遺容怕覩歎蛛網
緣幢燕泥落几觸目便酸楚塵緣淺老矣黃門倦賦營齋
營莫何補翟衣纔耀鸞釵折累汝卅年蓬戶歌太苦問佛火
鑪香可許重泉度鄉關夢阻喚玉佩歸魂青山荷鍤淚灑一
坏土

入聲甘州

長沙侯桂舲軍門隨左侯相統兵出關剿平回虜
駐軍疏勒築臺寄望雲之思繪疏勒望雲圖徵題
爲譜此闕

盼家書萬里雁行稀風沙玉門關向長河飲馬高臺倚劍落

日荒寒回看雕盤大漠心與白雲還灑盡思親淚熱血空彈
念我馳驅王事便橫戈瀚海敢唱刀環誓雄心許國尺組
繫樓蘭待歸來印懸如斗解征袍還舞彩衣斑憑誰問挂珮
弓處雪壓天山

新蕲詞卷六

錢唐張景祁蘇甫

金縷曲

送黃芑香明經回粵卽題其秋琴館詞次見贈元韻

罷飲冰堂酒柰聲聲催歸杜宇霎時分手瘦盡黃花還插鬢
幾見長開笑口撲霜葉征衫寒透獨臥枕椰驚歲晚掩清尊
月落烏啼後思嶺樹一搔首才名跌宕傾心久更新詞紅
牙點拍氣凌秦柳醉撥鷗絃如裂帛那付珠孃舞袖定分了
陳王八斗我已豪情銷減盡買千絲但把平原繡逢驛使待
三九

又

再和芑香

願曲銀屏底憶當筵珍珠盡埽箇儂蕉萃一樣青衫嗟落拓
那有懷情似綺更羞道花閒延已授簡梁園驚賦筆感知音
易墮尊前淚空唱徧升華水 觀書台向琅嬛地恁飄零江
湖聽雨暗銷英氣自倚秋林彈古瑟謾謾松風滿耳問白紵
何年親製我欲攸舫歌小海載紅兒便作扁舟計同畫賭壁
間字

滿江紅

癸未十月附輪舶赴淡水任行抵白犬山雲霧四
塞東北風大作機舟旬日不得發乃禱於天后乞
一夕西風直抵臺北當以平韻滿江紅詞爲神絃
曲如白石道人故事頃刻詞成向晚旗腳頓轉黑

夜渡洋日午已抵基隆矣

瀾漫滄溟望天半靈旗未來擬一夕
焱輪蹴浪十日裴回鱗甲千盤迷
嶼嶼佩環八寶隱樓臺祝瓊妃助
我片颿風鍼路開
虬駕出雲氣排龍涎熬篆香灰仗
神鐙導引直指蓬萊
驅鱷文章留絕域釣鼉身手借仙
才向中流擊楫奮雄心
鼉鼓催時法人有事越南海防甚亟

瑞鶴仙

海國餞春兼感時事黯然言愁

綠蕪渾似繡漸海國春深疏簾清
畫芳菲盡銷瘦任餘寒在水算笳
吹皺新愁勝酒卻付與吳姬笑口
黯沈沈草色天涯遮斷夕陽亭堠
回首金狨繫馬紫曲調鴛鴦冶情
如舊郊原望久青旗影暗垂柳問
東風底事未醒花夢又是蟬前燕
後

儘重尋世外桃源亂紅在否

風蝶令

寄樹林鶯亂尋巢海燕忙西園風雨夜來狂知否一春花事
要關防曉夢迷金屋清歌繞畫堂薄寒輕暖費商量卻把
珠簾深掩自焚香

又

畫戟圍香寢飛英落酒杯鞭絲又逐暗塵來走向垂楊樓下
日千回海氣魚龍靜春聲燕雀猜夕陽明處繡旗開冷看
野花紅上鬪雞臺

南鄉子

臺北氣候殊常暴風時起陰雨連絲絕少暄妍景
象郡城初建煙戶宋寥彌望綠塋青疇三春電謝

花事闌然索居寡懽不覺鄉思之橫集也

瘴雨鎖簾櫳盡日狂吹舶趁風送得春來春又去恩恩不見
蠻花委地紅 悔逐海鷗蹤似度天邊月半弓窮島盤螺青
不斷濛濛併作鄉愁萬疊濃

望海潮

基隆爲全臺鎖鑰春初海警狎至上游撥重兵堵
守突有法蘭兵輪一艘入口游奕傳是越南奔北
之師意存窺伺越三日始揚帆去我軍亦不之詰
也

插天翠壁排山雪浪雄關險扼東溟沙嶼布碁廳輪測綫龍
驤萬斛難經笳鼓正連營聽回潮夜半添助軍聲尙有樓船
獵帆影裏矗危旌 追思燕頤勳名問誰投健筆更請長纓

警鶴唳空狂魚舞月邊愁暗入春城玉帳坐談兵有獐花壓
酒引劒風生甚日炎洲洗甲滄海濁波傾

綠意

綠陰

濃陰似幄把好春暗換芳事零落漸稀疏籬漸掩回廊重重
透入珠幕幽禽貪覓低枝陰便忘了吾廬樓託任滿庭羅出
迷濛占斷夕陽闌角誰向西園載酒側行更礙帽驚墮殘
萼纖雨搖煙做弄清愁不怕卷簾人覺登樓已恨天涯遠況
眼底寒雲輕閣總讓他抱葉蟬閒夢繞舊游林壑

南浦

胡月樵都轉之季女雲琇幼字盛恆山觀察之子
汝霖爲室結褵尙遠藥碓逖逝女誓入門守志月

樵乃偕赴閩中備匱具歸之徵詩及余爲譜是關
隔苑送輕寒點芳枝怕見霜痕凝曉春去畫堂空天涯路曉
殺新鶯嬌小蘼蕪夢杳綠波吹皺愁多少一曲瓊簫淒欲斷
碧海夜蟾都老誰憐黃竹成箱但鮫綃織淚房櫳深悄塵
鏡換華年冰心冷不共菱花流照餘暉戀草客程空指斑駁
道回首烏衣門巷近雙燕甚時飛到

河傳

紅豆春瘦鷓鴣啼綠樹愔愔路迷蕩舟越女蛾黛低前溪柳
條吹向西海燕營巢來別苑鈴索顫蹴損香英亂掩朱門
又斜曛銷魂滿隄煙草昏

鳳棲梧

花底宮壺催曉箭庭院無人胡蝶團成片翠被寒輕香夢淺

不知窗外嘯鴛鴦
滿徑綠雲迷望眼
扶下蘭階
浣卻裙羅
茜鏡裏
春愁尋不見
游絲罥落釵頭燕

瀟瀟雨

譚仲修爲懷甯宰春初書來問狀竝惠新棐篋中
詞六卷賦此卻寄

問靈和柳色幾經霜
誰識舊風流
乍新篳酒熟
春寒未減
悔典鷁
裴芳草
漸迷海角
何處可登樓
解說飄零
況惟有沙鷗
回首中原一髮歎
鯨波浩淼
帆影難收
正江梅如雪
歸夢獨悠悠
謝多情
屋梁殘月照離人
千里共清愁
攜琴好訪成
連去水
遶山幽

水調歌頭

登東門城樓望海感賦

壺嶠竟何在綠浪繞珠宮春風來自天上先到大瀛東天似
穹廬四面人似微塵幾點萬象付虛空出世狎鷗鳥放眼小
鴻濛 鞭走石槎犯斗渺難窮千山忽動鱗甲蹙邊海雲紅
要喚馮夷起舞更斫靈鼉建鼓碧鏡淨磨銅倚劒一長歎變
減任魚龍

又

再申前意爲籌海者進一解

積氣轉黃頰大地一浮漚不知包絡多少赤縣與神州本是
蛟龍窟宅誤認金銀宮闕爭戰幾時休安得斷鼉足截住萬
方流 桑田影擣木燭總虛舟盲風怪雨無際出沒使人愁
縱有將軍橫海便帥戈船下瀨域外問誰收何處覓珊瑚莫
把釣竿投

臨江仙

記得鈿車行陌上
芊絲芳草初齊歸來又聽玉驄嘶
風回羣畔
蜨雲墮橫邊
犀斜月半窗花影碎
滿庭香霧淒迷
待兒垂下繡簾低
簫聲猶未斷
偏有曉鶯啼

南樓令

寶帳曉雲空
春愁似夢中小池塘
綠到新桐穠李香
車門外斷塍魚影唼殘紅
流水去無蹤
高花易墮風送春歸休
怨晨鐘清簾疏簾看
總好尙分得翠陰濃

疏影

寄許邁孫杭州用玉田寄草窗韻

離愁暗結想畫橋柳浦吹滿晴雪
自汎書船還載紅兒
錫稀杏老時節
斜川跌宕詩情在
臘舊夢白鷗能說
柰宦游海角

飄零景物異鄉全別 追念南湖翠樹古梅半臥水皴染苔
髮約我歸來倚樹閒尊埽盡籬根殘葉小園冷落蘭成賦更
望斷江關懷絕待甚時醉撥瑤琴寫出閨風秋月

憶舊游

邁孫酷嗜倚聲老而彌篤旣彙納蘭頻伽二集復
以龔蘅圃侍御舊刻山中白雲詞流傳日少檢篋
藏足本重校付鋟豈惟玉田功臣亦後來者之導
師也因紀以詞

甚歌塵浣雪醉墨題香換卻華年未減疏狂興又絃詩竹外
塵笛梅邊畫簾夢回微雨春思託纏絲邁孫時有縱側帽看
花浮眉寫黛不盡流連 詞仙舊游處怕重問當時玉照堂
前願曲西泠路但哀鵲嗁恨萬綠生煙故山尙餘清響檢點

白雲篇湖鶴背天風簫聲斷續空翠閒

浪淘沙

芳事付輕塵不埽花茵避風雙燕故逡巡今日畫堂寒似水
自話酸辛草色綠羅裙難駐雕輪珠簾隔斷萬重雲猶有
遙岑青一角銷盡眉痕

慶清明

吳中久不得仲英書賦此寄懷兼訂後游

柳色侵袍蘋絲度鏡江南芳景年年新詩袖裏醉吟獨自垂
鞭更與倚闌縱目盪胸雲氣五湖天西窗下翠生硯几涼偃
琴絃金谷俊游易冷記霧深花密曲奏靈僊蓬山夢遠空
尋海嶠風煙待約米家畫舫雨頭簫管酒如泉香谿去聽歌
最好一路紅蓮

解連環

紀夢

蕙鑷銷歇正蟬紗霧掩夢飛胡蝶指翠屏畫出江南是楊柳
灣頭路回峯接縹緲朱樓望不斷碧雲天末有留儂小艇去
去未遙試訪桃葉門前亂飄絳雪喜芳華照眼蘭氣輕裊
怕隔簾便是紅牆把瑤瑟深情凭肩低說算雨迷離又喚醒
怨春鷓鴣待迴身鏡臺抱影袖寒墮月

曲游春

濺盡花前淚看別時衫袖猶染愁碧海燕飄零又年年誤了
翠樓消息天半明霞隔況鏡裏笑桃顏色仗枕函一縷春雲
穿入算寒簾隙綺陌行人望極記雪院垂鐙月榭橫笛酒
醒香銷問那堪重聽渭城殘拍暝雨連江驛念流水芳華應

惜更忍教團扇乘鸞網蟲暗積

浣谿紗

過了櫻桃尙薄寒吳絲重替越羅單更堪簾外雨潺潺幽
草上階分翠屨孤花冑樹託朱闌遠山莫作畫圖看

小重山

幾點疏鴉眷柳條江南煙草綠夢迢迢十年舊約斷瓊簫西
樓下何處玉驄驕酒醒又今宵畫屏斜月上篆香銷憑將
心事託回潮青谿水流得到紅橋

菩薩蠻

效容若體卽次其韻四首

楊枝生小憐人別輕雲約略籠新月江上雨如絲畫簾殘夢
時夢痕留不得無那蓬山隔幽恨比春潮六時渾未銷

又

黃昏漸起城頭鼓
柘枝未罷當筵舞
何苦勸離觴
玉筍橫雁行
看花情味別
花瘦憐華月
清淚泣多時
海棠垂幾絲

又

寶簾一夜霜
華白鏡波照夢春
雲隔香霧溼羅衣
不知銀漢西
井闌閒絡緯
醒也和愁睡
玉簫不宜秋
暗飛螢自流

又

愁紅薄暈桃花紙
千金密意珍珠字
錦字疊成雙
回環知幾行
花深春似客
道遠人空憶
莫是不還家
慵歌陌上花

聲聲慢

河陽君彈琴小影用樊榭老人停琴仕女圖韻

低鬟按譜拂袖移徽
瑤情不度闌干古
怨新愁曲中無限關

山娟娟露涼瀉韻激清商變了春妍幽思悄想冰絲彈罷乍
忍輕寒 依約明璫在眼慣留香鏡裏殢酒鐙前老去文園
綠窗殘夢成煙屏閒素鸞照影幾銷磨錦瑟華年風簾靜問
何如拋軫倦眠

金縷曲

春事成塵流光若水憑闌索句百感橫生和竹垞
初夏詞韻

誰聽哀鶻語訥低垂重簾漠漠麴塵飛去紅葉翻階零落盡
換了尋香舊路早寂靜倦簫殘鼓惱恨西園胡蝶醉向風前
舞徧漫天絮秋滿苑遽如許 韶華占斷當初誤謾回頭嬌
花寵柳繫鈴窗戶都道雕闌暄景好那信林鳩喚雨更彩筆
題芳何處一片綠陰深似海惹鄰牆燕雀闌堂字身世感幾

凝於

又

書感用竹山韻

詩句弓衣繡黯銷魂關山笛裏嶺梅寒透居近蓬萊雲五色
攜得鑪煙滿袖灑檄草龍蛇飛走一紙阜囊驚帝座早屬車
輝映清塵後頻折徧鳳城柳丹沙擲米情非舊看當窗投
壺玉女笑開天口萬里乘槎星照海幻出重樓翠阜擊銅鼓
軍門行酒幾輩紫薇承雨露問銜書能到雞林否須信是釣
鼈手

東坡登州海市詩
重樓翠阜出霜曉

秋千索

淩波密約探芳去便棹入越溪深處采得芙蓉不肯歸要驚
起鴛鴦侶
隔花瞥見金鞍駐斂笑顰遮伊偷覷急打蘭橈

碎綠萍都化作沾衣雨

又

雨絲低溼蘭翹重惱歸去籠鸚調弄花片輕拋怨薄情渾不
許香衾共月華穿入紗窗縫肯重續玉釭殘夢有意要平
他夜半盟還索贈釵頭鳳

臺城路

薄暮由艤舫乘小輪船赴滬尾夜宿山店

海門雙峽浮螺起飛輪浪花驚濺估舶連雲漁罾曬日廿里
波程如箭潮平收淺指鐙火沿流夜深猶見寂寞魚龍此中
樓閣萬千變山前茅屋似艇解鞍聊寄宿桑下誰戀曲巷
瓊簫荒臺畫角客裏悲歡難遣風塵倦眼總輸與沙洲早春
歸雁酒醒孤吟一星寒穗翦

木蘭花慢

萬重蓬海隔幾開落碧桃花歎蟬鬢棲塵銖衣溼露飄泊憐
他芳華暗隨逝水託春潮流夢到天涯杏鈿愁拋翠帶柳絲
疑撲香車堪嗟洛浦朝霞珠箔卷暮雲遮想低徊倚扇淒
涼擁髻燭淚紅斜盧家玳梁燕子但年年江國老風沙獨自
憑闌望遠暝煙催送歸鴉

又

花影

好春何太澹埋沒盡錦千堆詞玉笛無聲金尊若夢清影裴
回蒼苔亂橫萬點更誰知曾倚碧雲栽一片高寒委地畫堂
渾似天涯簾開明月去還來鴛燕莫相猜便東風著意輕
移茵席總是塵埃香階夜深露重賺尋芳溼透縷金鞵不道

仙山路隔誤人覓徧瑤臺

一翦梅

病起簾攏惻惻寒自叩仙壇自供瓶蘭扶來弱骨更珊珊羅帶嫌寬羅袖嫌單薄暝輕陰養息難檐馬聲殘檐鵲聲乾餘花還作好春看暖了屏山冷了朱闌

澡蘭香

蒲序將臨梅霖浹日病懷淒黯倚枕成吟用夢窗
淮安重午韻

涼收簟縠潤偈鑪煙節候雨窗乍覺初蟬噪響穉燕偎巢望斷碧雲佳約鎖深閨兩點愁顰人如秋前病萼一舸歸心綠徧橫塘菰弱試汲匏尊洗眼細字鐙昏黯銷吟魄薰絃意澹藥鼎綠深草色暗侵羅幕任炊殘午枕黃梁慵對檐花共

酌那更聽怨鳩聲聲鈴齋西角

鵲橋仙

鬪茶愁釀調冰怯冷好把越羅輕護晶簾半卷不成眠看幾
點疏螢穿戶蕉林傍水荷亭受月且與細評琴譜莫貪三
面拓蟬紗便忘卻中宵風露

滿庭芳

林氏板橋別墅臺榭幽邃水木明瑟珍禽異卉駢
列其中亦海國名園也仲夏停騶小憩主人時甫
京卿留飲花下塵襟頓滌用少游韻以寫其勝

竹粉飄香蓮衣滴露曉簾初卷新晴小橋飛蓋綠樹冒殘英
鍾鼎山林自樂行吟處水曲沙平藤陰下何須翠袖玉簫坐
調箏幽情鷗鷺識雲移畫障波浣塵纓有鳥譌花舞高占

仙瀛試向習池醉也風吹帽短鬢堪驚歸來晚昏鴉斷柳煙
雨鎖青城

水龍吟

楊花和邁孫韻

飄零直到天涯舞空尙笑心情懶靈和舊日丰姿頓盡況逢
春晚弱欲沾泥輕還墮水儘判蓬轉倩游絲絆住飛揚不定
那更託東風管 忍逐離亭去燕訴酸辛路旁羞見西園雨
猛殘紅滿地暗分悵怨墜夢成塵浮生無蒂草雲吹遠賸韶
華一綫萍蹤暫繫補看花願

臨江仙

蘋葉飄殘洲渚柳絲搖落江潯無邊風雨作龍吟萼萼千里
夢萍梗十年心 魚海兵戈未息鹿門伴侶誰尋異鄉何處

可登臨舉頭看白日樓外盡秋陰

又

古澗寒松獨嘯小山叢桂誰留窗前朱鳥忒啁啾全家窮島
寄明月故鄉愁 忼慨猶思用趙飄零何處依劉眼看鴈隼
擊高秋防身無一劍出世有扁舟

酹江月

法夷旣據基隆擅設海禁初冬余自新竹舊港內
渡遇敵艘巡邏者駛及之幾爲所困暴風陡作去
帆如馬始免於難中夜抵福清之觀音澳止宿茅

舍感賦

樓船望斷歎浮天萬里盡成鯨窟別有仙槎淩浩渺遙指神
山弭節瓊島生塵珠厓割土此恨何時雪龍愁鼉憤夜潮猶

助鳴咽 回憶鳴鏑飛空爇輪逐浪脫險真奇絕十幅布帆
無恙在把酒狂呼明月海鳥忘機谿雲共宿時事今休說驚
沙如雨任他窗紙敲裂

如此江山

觀音澳阻風七日

漫誇避世桃源好蕭寥迴非人境亂葉敲鐙寒濤卷榻鳥雀
柴門聲靜墟煙弄暝待蝦菜船歸酒懷都冷絕島淹留自憐
飄泊類蓬梗 江湖蹤迹倦寄故山猿鶴怨歸計難定羽檄
驚心兵戈在眼宦味平生消領安排釣艇問蓑笠元真甚時
乘興且趁回潮半帆隨雁影

清平樂

繁英未雪便把秋千拆報道西園風雨歇莫管杜鵑啼血

幾回園草蘭階儂心心事全乖悄向花陰尋夢無端拾得金釵

又

金鈴響斷門外嘵驚亂鎖日畫堂簾不卷拋卻春光一半
朱闌曲曲全遮綠陰深鎖窗紗獨自搜尋胡蝶不知滿院飛花

洞仙詞

霜欺病骨盼陽春來早及至春來倍寒峭歎香篝靜掩藥鼎
橫陳空厭勝何用靈爇剛卯傳書無一字天上青鸞咫尺
相思隔瑤島唱斷汝南雞斗帳籠雲任翠被殢人清曉縱未
覺韶華水東流那覺窗前亂鶯嘵老

阮郎歸

一春烟雨忒淒迷
隔簾聞馬嘶
柳絲無力埽長隄
暗塵吹向西
停畫槩
問前谿
舞風雙燕低
紅香滿徑啄成泥
杏梁高處棲

浣溪紗

福清道中

數頃沙田護碧潭
一枝塔影鏡中涵
海山依約見浮嵐
浦口白鷗迎遠客
城頭紅葉撲征驂
漸看風景似江南

曲江秋

馬江秋感

寒潮怒激看戰壘
蕭蕭都成沙磧
揮扇渡江圍碁賭
墅詫綸巾標格
烽火照水驛
問誰洗鯨波
赤指點鏖兵處
墟烟暗生更無漁笛
嗟惜平臺獻策頓銷盡樓船
畫鷁淒然猿鶴怨

旌旗何在血淚霑籌筆回望一角天河星輝高擁乘槎客算
只有鷗邊疏葦斷夢向人紅泣

秋霽

基隆秋感

盤嶺浮螺痛萬里胡塵海上吹落鎖甲煙銷大旗雲掩燕巢
自驚危幕乍聞唳鶴健兒罷唱從軍樂念衛霍誰是漢家圖
畫壯麟閣遙望故壘毳帳淩霜月華當天空想橫槊卷西
風寒雅陣黑青林凋盡怎樓託歸計未成情味惡最斷魂處
惟見莽莽神州算山銜照數聲哀角

翠連環

惜春詞譜吳子述自度曲卽用其韻

鬪草庭空圍燈幔冷韶光幾絲誰繫十二碧城環佩落遮斷

暮雲千里戰塵隨步起紅香化作青蕪地劫旛風信濕簾霜
氣釀出傷春味天際高拖層臺看素鸞飛下埽花游戲隔
蒼隄鵲催夢雨那惜霧綃霞綺玉笙寒似水鈿車一去重門
閉深院裏愁是垂楊影淚是新桐子

鷓鴣天

鐵鎖沈江計未成無邊笳鼓震連營潮回荔浦山城打月聞
楓林野火生檣燕泣陣鴉驚海門隔斷萬峯青尊鱸一夢
秋風晚愁殺江東老步兵

小重山

疊鼓傳籤出射堂侍中貂尾插盡嚴裝青旗楊柳拂球場烟
郊外親控紫駟纒歸去踏花忙歌樓新酒釀鬱金香琵琶
一曲奏伊涼封侯夢今夜到流黃

瑞鶴仙影

臨水見拒霜作花感遇成賦

綠波豔簇秋如錦霜華一夜輕壓綺懷漸老幽芳似舊翠深
紅巾誰燒絳蠟更扶醉雲屏笑插忍回看楓林賸葉鴉點數
枝踏還念青谿畔秀靨嬌顰倚風微怯舞衣易冷儘銷他
繡幃金鴨鏡裏韶年怕屈指花前暗招寄相思欲采未采望
楚峽

新蘅詞卷六終

新蘅詞外集

錢唐張景祁蘇甫

菩薩蠻

以下集自
石道人詞

春衣多是柔荑翦
春初早被相思染
心事兩人知
年年風絮時
玉梯凝望久
略比年時瘦
萬綠正迷人
翠禽嗁一春

又

闌干表立蒼龍背
西園曾爲梅花醉
紅萼未宜簪
玉鈿何處尋
玲瓏閒看月月影
玲瓏徹家住碧雲
西夜涼笙鶴期

減蘭

苔枝綴玉春蒲漸生
迎棹綠呼我盟鷗長
與行雲共一舟
數峰清苦回首江南
天欲暮嫩約無憑
化作西樓一縷雲

少年游

俊游巷陌舊家池館憶別庾郎時燕雁無心鴛鴦獨宿不合
種相思 梅花過了梨花落盡惟有玉關知甚日歸來翠尊
雙飲紅葉浪題詩

江城子

銷魂都在夕陽中古簾空寶箏空楊柳津頭香絮亂因風說
與依依王謝燕又見在小橋東 石榴一樹浸谿紅怕恩恩
莫恩恩舊約扁舟山雨打孤篷書寄嶺頭封不到吟未了意
難通

洞仙歌

韋郎去也花管人離別紅萼無言耿相憶有暗藏弓履難賦
深情問誰記舊曲桃根桃葉 自看煙外岫淚灑單衣倚竹
愁生步羅襪樓上對春寒柳怯雲鬆鎮長見黛痕低壓向夜

深風定悄無人漸漏水丁丁小簾通月

倦尋芳

曲屏近底依約睂山人妙飛燕一顧傾吳此地傷心重見回首江南天欲暮沙河塘上春寒淺夜何其歎幽歡未足雙蛾先斂又正是滿汀芳草嫩約無憑還解春纜那日青樓無限風流疏散楊柳夜寒猶自舞鴛鴦獨宿何曾慣怨東風漫裏回繞花千轉

解連環

綠陰無數問經年底事憑闌懷古誤後約寂寞劉郎敢喚起桃花任聽風雨帶眼銷磨但怪得世間兒女望高城不見壘鼓夜寒自恁虛度江淹又吟恨賦蕩湘雲楚水再見無路悔舊游作計全疏縱豆蔻詞工倩誰傳語暗柳蕭蕭算只有

暮鴉啼處怎忘得亂紅萬點恨春易去

慶宮春

高柳垂陰芳蓮墜粉爲君聽盡秋雨漫寫羊裙漸疏班扇恩
恩時事如許落帆沙際似鴟夷翩然引去傷心重見第四橋
邊冷雲迷浦自隨秋雁南來帶眼銷磨倩誰傳語水驛燈
昏漁汀人散暮色偏憐高處一篙寒汐算潮水知人最苦南
尋李白西出陽關離愁千縷

換巢鸞鳳

楊柳嬌癡理哀弦鴻陣寫入琴絲墜紅無信息惟有玉闌知
阿瓊愁裏弄妝遲訪問竹西歸鞍到時飄零久漫贏得一襟
詩思迤邐花滿市秋扇漸疏柰未成歸計玉笛無聲翠尊
易泣解道月明千里那日青樓小橫陳花中慣識人姝麗忽

相思雨綢繆何事輕棄

望海潮

淮南皓月竹西佳處謝郎也恨飄零千頃翠瀾一篙寒汐年知爲誰生月上海雲沈在柳橋花館呼喚登臨舊約扁舟木蘭雙槳夢中雲空歎時序侵尋記湘皋聞瑟喚起湘靈高樹晚蟬空城曉角解鞍少駐初程曾見似花人算幾番照我水驛燈昏客裏相逢與誰同度可憐春

永遇樂

宋玉歸來韋郎去也垂鐙春淺竹外疏花枝頭香絮散入溪南苑老魚吹浪亂鴉送日日暮棹移人遠問何時俊游巷陌傷心重見情懷正惡明璫素韞無限風流疏散官燭分煙玉容銷酒一一教誰管青樓夢好如今安在長恨相從未款

怕怱怱數聲嗁鳥亂紅萬點

減蘭

梅花仕女帳額

疏疏雪片落蕊半黏釵上燕釵燕籠雲京洛風流絕代人
梅花過了書寄嶺頭封不到不管盈盈枝上么禽一兩聲

生查子

人在小紅樓留我花閒住背立怨東風心事還將與 無語
倚蘭橈夢逐潮聲去今夜泊前谿明日聞津鼓

水龍吟

城頭眇眇嗁鳥庾郎先自吟愁賦紅衣入漿翠眉織錦怨人
良苦燕燕飛來鶯鶯嬌嬾怱怱歸去歎幽歡未足幽懷難寫
人何在輕分付 一點芳心休訴記當時送君南浦十年幽

夢五湖舊約六朝歌舞玉笛無聲玉鞭重倚離愁千縷看垂楊連苑朱門深閉綠陰無數

又

自隨秋雁南來冥冥歸去無人管闌紅一舸木蘭雙槳茂陵游倦月落潮生清寒煙澹酒醒波遠遣游人回首玉龍哀曲飄零久重相見長恨相從未款向秋來漸疏班扇汀洲自綠幽禽自語疏簾自卷屋角垂枝牆頭喚酒尊前易散問甚時同賦畫闌桂子舊家池館

疏影

秋柳

算鴉嚙處看垂楊連苑直恁清苦漠漠搖煙也恨飄零愁入西風南浦娉娉嫋嫋教誰惜更添了歲華如許尙未知笛裏

關山猶有暗黃千縷 還記章臺走馬有人似舊曲端正窺
戶朱玉歸來此樹娑娑別有傷心無數閱人多矣人何在漫
贏得憑闌懷古悵斷魂第四橋邊重見冷楓紅舞

又

落梅

一簾澹月在柳橋花館今夕何夕虛閣籠寒樓外冥冥暮愁
漸滿空闊西園曾爲梅花醉更添了幾聲嘯鴉甚謝郎也恨
飄零來踏梅根殘雪 化作沙邊煙雨亭皋正望極前事休
說染額人歸下了珠簾惟有池塘自碧夢中未比丹青見都
忘卻春風詞筆悔舊游作計全疏不共美人游歷

淒涼犯

五湖舊約今何許白頭歌盡明月亂紅萬點梅花過了故人

初別花中慣識正凝想明璫素韞夢依依汀洲自綠總付與
嘯鴉誰念飄零久水驛燈昏一篙寒汐恨春易去怕恩恩
玉笙吹徹記憶江南動庾信清愁似織漫裴回日暮待去柰
楚客

沁園春

與客攜壺爲我吹竽千頃翠瀾看垂楊連苑緩移箏柱冷雲
迷浦依約眉山金谷人歸青樓夢好釵燕籠雲晚不吹湘江
上擁愁鬟十二下了珠簾采香涇裏春寒背立怨東風聞
佩環有暗藏弓履綠香紅舞自修花譜象筆鸞牋嫩約無憑
昔游未遠翠袖佳人來共看人何在在柳橋花館記憶江南

秋霽

回首江南自織錦人歸澧浦捐襟寫入琴絲緩移箏柱暮愁

漸滿空闊綠楊巷陌而今正是歡游夕歎坐客喚起玉人醉
臥酒壚側長是暗度空指薔薇客裏平相逢無語岑寂記
當時青樓倚扇看花攜樂小喬宅亂落江蓮歸未得再見無
路何堪更繞西湖夜寒風細小簾通月

水龍吟

玉簪花和硯香

過三十六離宮粉香吹下簫聲裏玉妃起舞煙鬟霧鬢十分
梳洗釵燕籠雲嫣然搖動微涼意思恨玉鈿似埽羅衣初索
花長好人姝麗幽寂曲屏近底過秋風未成歸計玉珂朱
組浮雲安在閱人多矣臥看花梢疏疏雪片而今何意正紗
幘人獨愁多頓老一簾秋霽

蘭陵王

秋柳

望江國唯有池塘自碧飄零久高樹晚蟬愁裏恩恩換時節
亭皋正望極當日仙翁手植湘江上千頃翠瀾不管清寒與
攀摘蛾眉正奇絕教說與春來柳下坊陌送君南浦和愁
折抱幽恨誰語市橋攜手韋郎去也怎忘得總付與唳鵝
幽寂問誰識似去國情懷雙燕如客籠鞶淺出鴉頭韞愛良
夜微煖玉簫吹徹離愁千縷恨未了但暗憶

八聲甘州

題王子獻同年鑑湖醉月圖集草窗句

正滿湖光動萬星寒層闌幾回凭看銀潢瀉露晝橋橫笛沈
玉空明金谷蘭亭同夢酒與夢皆醒采綠鴛鴦浦煙冷秋屏
爲喚狂吟老監掩清尊謾憶未厭游情聽湘弦奏徹水調

夜樓清認秦鬟越妝窺鏡好江山歷歷舊經行憑誰寫山陰
醉臥齋月三更

柳梢青

集草窗二首限香字

清楚衣裳翠嬌紅嫵真態生香晚浴初慵瓊疏靜掩私語相
將少年紫曲疏狂人去後箏塵半牀團扇悲秋明璫照影
都是思量

又

曲折花房簪花籌酒換火篝香楊柳風流海棠廝勾蜨夢空
忙一般雅澹梳妝喜重見眉梢睡黃繡閣藏春瓊壺歌月
誰攜元霜

揚州慢

周文澹巖自金陵寄邗江春汎圖屬題集句用白

石韻

月滿秦淮江元津橫蒜石張天涯縈絆歸程韓向秋孌渡口

陳以華髮奈山青吳文記當日史達金戈鐵馬辛棄一江南

北陸羽扇揮兵吳文怕等閒重見周綠楊深閉重城姚雲

舊游在否姜夔十年夢屈指堪驚秦待跨鶴重來吳維舟試

望姜夔一晌留情周邦歌吹竹西難問趙希空惆悵洪檀板新

聲晁有朱樓迢遞汪元如今贏得愁生顧

菩薩蠻以下集詞調名

小樓連苑春聲碎愁春未醒佳人醉春霽瑣窗寒探春翦牡
丹 鞞紅西地錦琴調相思引步月畫堂春桃源憶故人

又

箇儂月底修簫譜六么花犯黃金縷消息隔簾聽瑤臺第一層
暗香爪茉莉鳳帳春多麗芳草怨王孫巫山一片雲

南歌子

白芩玲瓏玉垂楊重疊金五采結同心雪明鵲鵲夜戀情深

又

玉女搖仙佩金人捧露盤出塞定西番帝臺春舞馬滿朝歡

望江南

紗窗恨眉嫵憶秦娥燭影搖紅金盞子貂裘換酒玉人歌南浦定風波

浣谿紗

月上瓜洲豆葉黃魚游春水白蘋香笛家南浦夢橫塘水調歌頭過瀾歇洞庭春色應天長大江東去意難忘

生查子

夏日宴贊堂黃鸝繞碧樹白芎曲江秋芳草臺城路
簇水
芰荷香明月生南浦綠蓋舞風輕大有瀟瀟雨

少年游

月照梨花玉京秋無悶踏青游芳草西河垂楊南浦明月棹
孤舟
洞庭春色霜天曉角新雁過妝樓並蒂芙蓉換巢鸞
鳳薄倖夢揚州

憶秦娥

思佳客霜天曉角城頭月城頭月早梅芳近暗香消息
早
羅特髻丁香結愁春未醒金蕉葉金蕉葉青衫溼徧洞庭春
色
青衫溼徧顧
梁汾自製詞

更漏子

後庭花深院月如夢畫屏秋色一絡索四和香孤鸞玉簫涼
雙雙燕聲聲慢白苧青衫溼徧芳草渡碧雲深闌千萬里
心

河傳

咏柳

南浦眉嫵酷相思白苧歌頭柳枝愁春未醒玉作平漏遲西施
采蓮十二時 如此江山新念別春草碧如夢秦樓月醉紅
妝拂霓裳垂楊箇儂情久長

又

戲作塞外之音

出塞入塞望仙門歸國遙思遠人鎮西八歸河瀆神陽春柳
枝摘得新 側犯輪臺蕃女怨胡擣練大酺離亭宴上西樓

玉京秋甘州笛家憶舊游

臨江仙

燭影搖紅西地錦傾梧染勒金船傳言玉女孟家蟬雪明鴉
鵲夜春霽鷓鴣天 丹鳳吟愁春未醒阮郎歸醉花間無愁
可解解連環西湖花上月南浦柳含煙

江城梅花引

貂裘換酒醉花陰鳳池吟鳳樓吟燭影搖紅法曲獻仙音月
上海棠花自落埽花游春去也夏初臨 無愁可解少年心
戀香衾戀繡衾瀟湘夜雨留客住庭院深深並蒂芙蓉調笑
纖停鍼揉碎花箋青玉案殢人嬌釵頭鳳一寸金

小梅花

芳草碧垂楊碧杏花天影秦樓月滿庭芳倦尋芳紅情綠意

別怨杜韋孃春風嫋娜間中好八節長歡被花惱念奴嬌惜
奴嬌步月鳳皇臺上憶吹簫傷春怨傷情怨蕙蘭芳引珠
簾卷珍珠簾水晶簾傾杯品令金盞倒垂蓮愁春未醒陽臺
夢輓轡金井花心動握金釵惜分釵傳言玉女送入我門來

金縷曲

綠意新荷葉宴西園瀟湘夜雨畫屏秋色月上海棠珠簾卷
哨徧陽春白雪清商怨氏州第一出塞琵琶仙品令望湘人
南浦青衫溼紗窗恨撲胡蝶荔枝香近丁香結彩雲歸瑤
花如夢箇儂消息別怨扁舟尋舊約滿路花新念別折楊柳
湘春夜月如此江山留客住夢芙蓉簇水雙鷗

船笛

新蘅詞外集終